

Gadataidi inānite Pabodo nānō cadota ante yewæmongainta

*Gadataidi inānite Pabodo, Waa quēwēedāni,
angampa*

¹ Botō Pabodobo inōmo inte, Minitō acæminimpa, ante yewæmōmopa. Mæmpo Wængonguī incæ Itota Codito ingante, Nāni ōmæmōe, angā nāni ōmæmongacāimpa. Mæmpocā iñōmō Itota Codito tōnō guēa cædinque botō imote da godonga gotabopa. Inique botō dicæ waodānique ānāni ēñente gotabogaa. Botō imote edæ dicæ waocanique da godongā gotabogaa. ² Minitō Gadatiabæ wayōmō wacabo wayōmō wacabo quēwēmīni inte Codito ingante mīni godongāmæ pōnencabo inōmīni inte edæ ēñencæminimpa, ante mōnitō mōni pōnencabo tōmāmōni iīmaī ante apænemōnīpa.

³ Wængonguī mōnō Mæmpo tōnō mōnō Awēnē Itota Codito godongāmæ pōnō waadete cæda ate mīnitō gānē pōnente waa quēwencæminimpa, āmōnīpa. ⁴ Adocā mōnō Mæmpo Wængonguī iñōmō, Minitō pedænguipogaque wīwa cæte mīni wæwēñōmō edæ abæ tawænte ponte baī botō gāmænō ponte quēwēedāni, angampa. Inique, Wængonguī nānō angainō baī cæcæminimpa, ante cædinque mōnō Awēnē Itota Codito mōnō imonte ō æncæte ante cægacāimpa. Mīni wēnæ wēnæ cæpāmo mongæncæboimpa, ante tōmengā nāmā

wepæ pædæ godonte bai cædinqe pönö ængä beyænque mönö wæætë quëwëmompa. ⁵ Edæ pedænguipoga iñonte münguipoga bayonte edæ, Mänömai bacæimpa, ante nê angaingä inongä inte mönö Mæmpo Wængongui iñömö edæ cöwë ñäö apäite bai waëmö pöni ëmönongä ingänö anguënë. Mänömai impa, ante botö, Amëë, ämopa.

Codito ingantedö ante watapæ ëñengæimpa

⁶ Minitö iñömö æbämë pöni cæmïni awædö. Mönö Codito waadete pönö cæcä beyænque mïnitö Wængongui añecä pömïnitawo. Ñöwo guiquënë nê añecä iñongante quïmæ panguïmæ gomïni. Wadäni, Quëwenguï taadö wadö inompa, ante tededäni ëñëninque mïnitö do Ao änewëmïni awædö. ⁷ Iñæmpa wadö incæ wïi quëwenguïnö inompa. Wæætë edæ, Minitö oda cæcæmïnimpa, ante cædinqe wadäni pancadäniya, Codito ingantedö ante watapæ möni apænedö ante edæ, Idiquibæ bacæimpa, ante cædäni apa ëñëwëmïni.

⁸ Mönitö Codito ingantedö ante watapæ apænemöni ëñëmïnitapa. Incæte mönitö adomöni incæ wadö ante apænemöni bai Wængongui wæætë pönö piinte apænte angä wæquïmönidö anguënë. Ayæ adobai Wængongui anquedo incæ öönädë owodinqe wææ pöninqe wadö ante apænecä bai Wængongui tömengä ingante wæætë godö piinte apænte angä wæquingänö anguënë. ⁹ Edæ doyedë möni änïnö bai botö ñöwo wæætë adodö ante ämopa. Codito ingantedö ante watapæ apænemöni ëñëninque mïnitö Ao ämïnitawo. Ininqe mänïnö ante æcämenque pönënamäi inte wadö ante apænecä ëñëninque Wængongui tömengä ingante

wæætë godö püinte apænte angä wæquiringnö angüenë.

¹⁰ Botö dicæ, Minitö waomînique botö ïmote Ao ancæmînimpa, ante apænebogaa. Wængonguinque, Ao ancæcäimpa, ante apænebo aedäni. Ayæ, Waomînique tocæmînimpa, ante dicæ cæbogaa. Waomînique tocæmînimpa, ante cæbo inte bai edæ Codito ingante në cædömo inämaï incædömoimpa.

Pabodo Wængonguinque da godongä gotabopa, angampa

¹¹ Botö tönîñamîni ëñëedäni. Codito ingantedö ante watapæ botö apænedö iñömö edæ wüi waodänique nâni mä pönengainö impa, ante ämo ëñëedäni. ¹² Mäninö ante waocanque dicæ pönö apænecä ëñente æntabogaa. Waocanque dicæ odömonte apænecä ëñëinique apænetabogaa. Wæætë Itota Codito edonque odömonte apænecä ëñëinique botö në æmo inte adodö ante apænebopa.

¹³ Oodeobo inömö inte botö iñömö edæ möni oodeocabo pönengainö ante wëenëñedë mäninonque ante ëñëinique quëwengaboï aedäni. Botö mäniñedë edæ Codito ingante nâni godongämæ pönencabo inänite wido cæcæte ante cædinque ancaa togænte edæ nanguï pönï pämo wægädänimpa, ante do ëñëminipa. ¹⁴ Ayæ botö tönö guëa pægäinâni incæ nanguï inâni guiquënë möni oodeocabo möni ëñengainö ante wædænque ëñente cæyönâni botö iñömö godömenque nanguï pönï ëñente cægaboimpa. Edæ mönitö mæmæidi nâni odömonte angainö ante botö, Mönö Ao ante

adodö eñente cæte quëwengæimpa, ante nanguï cæbo ingaboimpa.

¹⁵ Incæte botö badä cæncadë ongöñömote Wængonguï, Botö beyæ cæcæbiimpa, äinique edæ mäniñedë botö imote apænte ængaingä inte ñowo botö imote pönö waadedingue añecantapa. Ayæ ñowo pönï tömengä nämä nänö pönënö ante cæte todingue edæ, ¹⁶ botö imote pönö angantapa. Bitö oodeoidi inämaï inäni inänite apænebi eñëningue tömenäni botö Wengä ingante edonque ate bai ëwocacædänimpa, ante täno botö imote edonque odömongä adingue botö tömengä Wengä ingante do ëwocabo inte apænebo eñënanitapa. Ìinique botö waocä ingante, Æbänö cæquimoo, ante edæ änämaï intabopa. ¹⁷ Botö imote da godongä ate botö Codito täno nänö në da godongainäni inänite apænecæte ante Eedotadëe iñömö æidämaï intabopa. Wæætë edæ wadæ godingue botö wayömö Adabiabæ do godingue ayæ ate Daämaco iñömö ocæ ëmænte gotabopa.

¹⁸ Ayæ wadepo mënepoga go adodepoque ìinque go ate botö Pegodo weca mä eñacæte ante Eedotadëe æidingue mäa Wængonguï itädë tömengä weca quëwentabopa. ¹⁹ Ayæ wadäni Itota nänö në da godongainäni iñönänite botö adocanque ingante mönö Awënë Itota biwï Tantiago ingante adingue wadäni inänite adämaï intabopa. ²⁰ Mänömainö ante botö Wængonguï ayongä babæ änämaï inte näwangä ante yewæmömo aedäni.

²¹ Mänii gote eñate ate botö Tidiabæ godingue godömenque Tiditiabæ gotabopa. ²² Ìinique Oodeabæ quëwente Codito ingante nänï

godongämæ pönencabo mönō Codito nempo nē quēwēnāni iñōmō botō awinca cōwē adāmaī ināni inte önōwēnenque pōnengadānimpa. ²³ Tōmēnāni iñōmō iīmaīnō ante önōmoncaque ēñengadānimpa. “Wēēnēñedē mönō imonte nē togænte pangaingā iñōmō mönō pōnente quēwenguīne ante, Mānīne ante wido cæcæimpa, angantawo. Nōwo guiquēnē tōmengā, Wido cæquīne, ante nānō angāine incæ adode ante edæ watapæ apæneca ēñēnānīpa,” ante tededāni ēñengadānimpa. ²⁴ Īnīnque, Pabodo nōwo waa cæcampa, ante adīnque tōmēnāni Wængonguī ingante apænedīnque, Bitō waēmō pōnī ēmōnōmi inte nē waa cæbi ĩmīpa, ante watapæ apænegadānimpa.

2

Itota nānō nē da godongaināni Pabodo ingante Ao ānāni

¹ Ayæ mānīī pō godīnque iīncayæ ate catodote wadepo go ate botō Bedēnabee tōnō Eedotadēē iñōmō adodō æidīnque Tito ingante māomōna gocantapa. ² Wængonguī do botō imote apænete bai edonque odōmongā adīnque botō Eedotadēē iñōmō æidīnque iīmaī ante apænetabopa. Botō iñōmō oodeoidi ināmaī ināni weca godīnque, Codito ingantedō ante cōwē watapæ apænebopa, ante botō nænænānīque inānite awēmō apænebo ēñēnānitapa. Mānōmaī cædīnque botō, Æbānō cæboī, ante adodō adodō ante apænebo ēñēnīnque tōmēnāni pīināmaī incædānimpa, ante cætabopa.

³ Ayæ, Botō tōnō guēa pōningā Tito ingante adīnque pancadāniya, Īngā iñōmō Guidiego inongā

iñongante ämïni ëö togæncædänimpa, ante pïinte änäni incæte nê änäni guiquënë, Eö togæedäni, ante änämaï inänitapa. ⁴ Eö togængæimpa, ante nê pïinte änäni nâni wææ angainö ante mönitö iñömö Codito Itota gä pe æmpote æængä beyænque abæ tawænte ee gote bai quëwëmönipa. Mänömaï iñömonte pancadäniya, Æbänö quëwënänii, ante edæ awëmö acæte ante cædinque edæ, Mönö caipæ imompa, ante bai babæ cædinque mönitö weca pönäni wætamönipa. Ayæ edæ mönitö tömënäni nâni wææ änö beyænque nê cæte quëwëmöni bacæmönimpa, ante cædinque tömënäni godömenque, Cæedäni cæedäni, ante wææ änewënäni wætamönipa. ⁵ Incæte edæ, Mönö Codito ingantedö ante watapæ möni apænedö näwangä ante impa, ante mïnitö oda cædämaï incæminimpa, ante wææ cædinque mönitö wantæ iñö incæ nê wææ änewënäni inänite ëñente cædämaï intamönipa.

⁶ Nænænäni inänipa, ante wadäni nâni nê waa adönäni iñömö æbämë ëmönänii, ante botö iñömö edæ wædämaï imopa. Edæ Wængongui incæ waocä ingante apænte acæte ante cædinque adämaï ingampa. Mimönoque acampa. Ìniquè botö idæwaa apænebo ate iinäni incæ ædö cæte godömenque apænequïnäni. ⁷ Iñæmpa iinäni incæ edæ do ëñänitapa. Pegodo ingante mönö Awënë incæ pönö angä ate tömengä oodeoidi inänite mönö Awënë ingantedö ante nê watapæ apænecä ingampa. Botö imote adobai mönö Awënë incæ pönö angä ate botö wæætë oodeoidi inämaï inäni inänite nê apænebo imopa. Ìniquè botö

mänömainö ante apænebo ate nē änāni iñömö, Pegodo cæcä bai Pabodo adobai cæcampa, ante do eñenānitapa. ⁸ Pegodo oodeoidi weca gote cæyongante Wængongui tōmengä tönö godongämæ cæcä bai botö guiquēnē oodeoidi ināmaï ināni weca edæ gote cæyōmote adocä incæ botö tönö adobai edæ godongämæ cæcampa, ante do eñenānitapa.

⁹ Tantiago, Pegodo, Wäö iñömö nē tæi emönāni inānipa, ante adinque wadāni, Gönönīwæ onguitanca bai inānipa, ante apænedānipa. Ininque botö apænebo eñenīnque mänināni, Onguitancaidi, nāni änāni iñömö edæ, Pabodo ingante Wængongui mänömaï pönö waadete cæcampa, ante adinque botö imote ayæ Bedēnabee ingante, Mōnitö tōniñamīna imīnapa, ante tōmēmæ inö pædæ pompote bæi ongompodānitapa. Ayæ, Mōnitö oodeoidi weca gote apæneyōmōni mīnitö wæætē oodeoidi ināmaï ināni weca gote apænecæmīnimpā, ante godongämæ Ao änānitapa. ¹⁰ Ayæ, Mīnitö nē ömaadāni inte wædāni inānite ante cōwē pönēninque waa cæcæmīnimpā, äninque mäninque ante wææ änānitapa. Mäninö nāni äninö incæ botö cōwē pönēninque edæ nanguï cæinente wæbo intabopa.

Pegodo ingante Pabodo angä wæcampa

¹¹ Ayæ Pegodo Antioquiya iñömö pōninque wīi nō cæcä adinque botö tōmengä awinca waa adinque, Bitö pante wæquinque wënæ wënæ cæbi imīpa, ämo wæcantapa. ¹² Iīmaï edæ Pegodo cæcä inongäimpa. Tæcæ Antioquiya pōninque tōmengä oodeoidi ināmaï ināni weca wæætē wæætē pō guī pō guī ongōninque godongämæ cænongäimpa. Incæte Tantiago nänö

da pönöninäni pönäni ate Pegodo iñömö edæ, Mönö
 eö togængæimpa, ante nē ānönāni pīināni wæcæ
 wæ, ante guiñēnongä inte edæ oodeoidi ināmaï
 ināni weca ñowo cænāmaï inte edæ gomonga gote
 cæñongäimpa. ¹³ Mänömaï wadonque cædingä
 inte ñowo wadonque cæyongante tōmengä tönö
 oodeoidi tōmänāni wadonque cædināni inte edæ
 ñowo wæætē wadonque cædānipa, ante adinque
 Bedēnabee incæ oda cæte wapiticæ cæcantapa.

¹⁴ Ìinque edæ Codito ingantedö ante watapæ
 mönö eñēnō nö pönī ī incæte tōmēnāni nö cædāmaï
 inte wapiticæ cædānipa, ante adinque botö
 tōmänāni ayönāni edæ Pegodo ingante iïmaï
 ante ämo wæcantapa. “Bitö iñömö oodeobi inömi
 inte edæ oodeo ināmaï ināni bai ñimpo cæte
 quēwēninque edæ wīi oodeoidi nāni wææ angainö
 ante eñente quēwēmipa. Incæte bitö, Oodeo ināmaï
 ināni incæ oodeoidi nāni wææ angainö ante eñente
 quēwencædānimpa, ante quimæ wææ ānewēmii,”
 ämo wæcantapa.

*Mönö pönēnō beyænque mönö tōmämö
 quēwēmompa*

¹⁵ Oodeoidi ināmaï ināni nāni eñēnāmaï
 quēwencabo bai ināmaï imöni inte mönitö iñömö
 edæ oodeomöni nē eñagaimöni imönipa. ¹⁶ Incæte
 edæ iïmaï ante do eñēmönipa. Iïmaï cæedāni, ante
 Möitee wodi nänö wææ angainö ante eñente cæcä
 beyænque waocä dicæ Wængongui ayongä edæ
 nö cæcä baquingää. Wæætē Itota Codito ingante
 wede nänö pönēnō beyænque waocä nö cæcä
 bacampa, ante mönitö do eñēmönipa. Ìinque,
 Waocä æcämenque incæ mäninö Möitee wodi nänö

wææ angainö ante tömengä nänö eñente cædö beyænque edæ nö cæcä badämaï incæcäimpa, ante do eñëmöni inte mönitö adobaï, Ædö cæte mäninö beyænque nö cæmöni baquïmönii, ante eñëmönipa. Wæætë, Codito ingante möni wede pönënö beyænque nö cæmöni bacæte ante mönitö adobaï tömengä ingante wede pönëmönipa.

¹⁷ Ìninqe mönitö oodeoidi ïmöni iñömö, Mönö Codito nempo quëwëninque Wængonguï ayongä mönö nö cæmö bacæimpa, ante cæmönipa. Mänömainö ante cædinque mönitö në wënæ wënæ cæmöni inte wæmöni incæte dicæ Codito angä beyæ wënæ wënæ cætamöniyaa. ¹⁸ Mäninö Mõitee wodi nänö wææ angainö ante eñente cæte quëwengæimpa, ante botö pönengainö ante do wido cægaboimpa. Mänömainö ante botö pönengainö ante në wido cægaimo inte botö ædö cæte wæætë adodö ænte baï cædinque, Mäninö ante eñente mönö quëwengæimpa, ante anguïmoo. Mänömainö ante ämo inte baï botö Wængonguï nänö wææ angainö ante edæ në eñënämaï ïmo bacædömoimpa. ¹⁹ Edæ, Wængonguï nänö wææ angainö ante ædö cæte tömänö ante eñente cæquïmoo, ante botö wædö beyænque në wæwocaimo bagaboimpa. Ìninqe botö në wæwocagaimo ïnömo inte mänine ante eñente cæcæte ante quïnante wæquïmoo. Wæætë edæ Wængonguï beyænque ante botö quëwenguïnque ïmopa.

²⁰ Mönö Codito ingante awäa timpodäni wæñongante botö tömengä tönö godongämæ wænte baï bagaboimpa. Ìninqe botö baonga eñate quëwëmo incæte botö wii tömömo quëwenguïmämo

ēwocate quēwēmopa. Wæætē Codito nānō quēwenguīmāmo ēwocate quēwēmopa. Īninqe adocā Codito Wængonguī Wengā botō ĩmote waadete pōnēninqe nāmā tōmengā wepæ ante, Wængonguī quī, ante botō beyæ pædæ godongā adinqe botō baō ēñate quēwēninqe tōmengā ingante wede pōnēninqe quēwēmopa. ²¹ Īninqe, ĩmaī cæedāni, ante Mōitee wodi nānō wææ angainō ante ēñente cædinque mănōmainō cæmō beyænque ñā mēnongate nō entawēmō bamō bai mōnō Codito ōnonque pōnī wæncægacāimpa. Mănōmaī beyæ Wængonguī nānō pōnō waadete cægainō ante botō Ao ante ō æninqe cōwē wido cædāmaī ĩmopa.

3

Mōnō pōnēnō beyænque mōnō quēwengæimpa, ante

¹ Gadataidi ōnonque pōnī mīni cæcabo ĩnōmīni inte ēñēedāni. Æcānō wadō ante apænecā ēñēninqe mīnitō dowænte bai ōnonque tedewēmīnīpa. Īñæmpa botō doyedē, Itota ingante æbānō awāa timpodāni wængacāī, ante botō edonque pōnī odōmonte apænebo ēñēninqe mīnitō ōnōwēnenque ante bai do pōnēmīnitapa. ² Adodeque āmo ate apænemīni ēñēmoedāni. Mīnitō Wængonguī Ōnōwoca ingante æbānō cæte æmīnīi. Mōitee wodi wææ nānō angainō ante ēñente mīni cædō beyæ mīnitō tōmengā ingante æmīnitawogaa. Wæætē edæ mōnitō apænemōni ēñēninqe wede pōnēmīni inte æmīnitawo.

³ Ìñæmpa mīmō ömædē ìmīni inte ēñēnāmaï incædō. Mīnitō wēēnēñedē mā pōnī pōnēninque Wængonguï Öñōwoca tōnō nē cægaimīni inte ñōwo wæætē edæ ömæwocamīni inte baï edæ baonga ēñadinque nāmanque cædinque ìnque cæmīni. ⁴ Wængonguï nangui pōnī pōnō cæcä caate wædinque mīnitō önonque beyæ caate wæmīnitawo. Tömengä dicæ önonquedō ante cæcæte ante pōnō cæcä wæmīniyaa. ⁵ Wængonguï tömengä Öñōwoca ingante da pōnōninque mīnitō weca bamönengæ pōnī cæcampa. Quīnante mänōmaï cæcää. Edæ, Möitee wodi nänō wææ angainō ante ēñente mīni cædō beyæ ante dicæ cæcäa. Wæætē mönitō apænemōni mīni ēñente pōnēnō beyæ Wængonguï tömengä Öñōwoca ingante da pōnōninque mīnitō weca bamönengæ pōnī pōnō cæcä æmīnipa.

⁶ Wængonguï apænecä ēñēninque Abadäo wodi, Nöingä ante apænecampa, ante wede pönengacäimpa. Ìnque tömengä wede nänō pōnēnō beyænque Wængonguï, Botō ayōmo Abadäo ìñömō nē nō cæte quëwēnongä ingampa, angacäimpa, ante yewæmongatimpa. ⁷ Mänōmainō ante adinque mīnitō ìmaï ante ēñēdäni. Mönō nē wede pönēmō ìñömō Abadäo wodi pæimō baï adomō ìmōmpa, ante ēñente pōnēdäni. ⁸ Wængonguï, Oodeoidi ìnāmaï ìnāni incæ wede nāni pōnēnō beyænque botō ayōmo edæ nē nō cæte quëwēnāni bacædänimpa, ante badoncæcäimpa, ante dodäni edonque adinque Wængonguï beyæ yewæmongadänimpa. Ayæ Abadäo wodi ingante apænedinque tömengä, “Botō bitō ìmite pōnō waa pōnī cæbo æmi ìnque bitō

beyænque wadäni nāni cabo wadäni nāni cabo tōmancabodāniya edæ watapæ quëwenguinānidō anguënë,” ante apænegacäimpa. Mänömaï impa, ante yewæmōninque dodāni wëenëñedë pōnī Wængonguī waa pōnī nānō cæquinō ante yewæmongadānimpa.⁹ Abadäo wodi cōwë ædæmō cæte pōnengaingä iñongante Wængonguī pōnō waa pōnī cægacäimpa. Mönō nē wede pōnëmō iñömōnte tōmengä adobaï pōnō waa pōnī cæcä æninque mönō iñömō edæ Abadäo wodi tönō godongämæ watapæ quëwëmō imönō anguënë.

¹⁰ Wæætë edæ, “Wææ ante botō yewæmongainta adinque æcänō tōmänō ante dicæ cæcää tōmengä iñömō Wængonguī pīinte angä wæwocaingä ingänō anguënë,” ante Möitee wodi incæ do yewæmongacäimpa. Ìninque Wængonguī edæ nānō wææ angainō ante waodāni, Botō ëñente cædō beyænque quëwencæboimpa, ante nē änewënāni incæ wīi eyepæ ëñente cædāni inönāni inte tōmënāni tōmänāni inānite Wængonguī pīinte angä wæwocaināni inānidō anguënë. ¹¹ Ayæ wacä Wængonguī beyæ yewæmōninque, “Në nō cæte quëwënongä incæ tōmengä nānō wede pōnënō beyænque quëwencæcäimpa,” angacäimpa. Ìninque iïmaï ante mönō edonque ëñengæimpa. Möitee wodi nānō wææ angainō ante ëñente cæte beyænque waocä dicæ Wængonguī ayongä nē nō cæcä badinque quëwenguingää. ¹² Wængonguī nānō wææ angainō ante ëñente quëwengæimpa, ante nē cædönāni iñömō tōmënāni dicæ nāni wede pōnënō beyæ quëwënāniyaa. Wæætë, “Mäninō ante nē ëñente cæcä iñömō tōmengä nānō ëñente cædō beyænque quëwencæcäimpa,” ante Möitee

wodi nänö yewæmonte angainö bai impa.

¹³ Ayæ adobai, “Æcänö ingante awäa wodoncædäni a ongöna tömengä ingante Wængongui piingä wæwocaingä ingänö anguënë,” ante Möitee wodi yewæmongacäimpa. Inique Wængongui nänö wææ angainö ante wii eyepæ ëñente cæmö beyæ mönö wæwocaimö inte wæyömonte mönö Codito iñömö, Abæ tawænte gote bai quëwencæminimpa, ante cædinque mönö beyæ wæætë wæwocaingä badinque edæ awäa wæninque a ongongacäimpa. ¹⁴ Abadäo wodi ingante Wængongui waa pönï pönö cægacäimpa. Ayæ, minitö oodeoidi inämaï iñöminite Itota Codito pönö cæcä beyænque Abadäo tönö godongämæ watapæ quëwencæminimpa, ante Wængongui adobai pönö waa cæcampa. Mänömaï bacäimpa, ante cædinque Codito tömämö imonte, Minitö wede pönëninque botö Önöwoca ingante ænte ëwocacæminimpa, ante cædinque mönö imonte æncæte ante nämä wepæ godonte ængä beyænque quëwëmompä.

Wængongui täno, Cæquïmo, aninque ayæ ate wææ angacäimpa

¹⁵ Botö tönïñamïni ëñëedäni. Botö, Waomö mönö cæï bai Wængongui mönö beyæ wodo adobai cæcampa, ante odömoncæte ante iïmaï ante yewæmömo aedäni. Waoda, Möna guëa cæcaya imönäpa, ante Ao äna ate adocanque inte ædö cæte wadö ante cæquëngää. Ayæ, Mönö godömenque cæcäimpa, ante waocä adocanque inte ædö cæte edæ ante cæquëngää. Nöwo edæ ämo ëñëedäni. Wængongui, Mönö godongämæ cæcabo bacäimpa,

ante botö pönö cæcæboimpa, angä ëñëninque mönö Ao ante cæquënönö iñömö edæ wodo adobaï impa. ¹⁶ Mæmæ Abadäo wodi ingante apænedinque Wængongui, Bitö Pæingä ingante botö cöwë pönö waa cæcæboimpa, angacäimpa. Mänömaï äninque tömengä Abadäo wodi ingante, “Bitö pæinäni,” ante änämaï ingacäimpa. Wæætë, “Bitö Pæingä ingante pönö cæcæboimpa,” äninque Abadäo wodi Pæingä adocanque Codito ingante ante pönëninque angacäimpa.

¹⁷ Mänömainö ante apænedinque botö iïmainö ante odömoncæte ante apænetabopa. Abadäo wodi ingante Wængongui, Botö pönö cæbo ate mïnitö Ao ämïni ïninque mönö godongämæ waa cæcæimpa, ante wëenëñedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, Iïmaï cæedäni, ante pönö wææ änongäimpa. ïninque Wængongui wantæpiyæ ate wææ äninque do nänö angaine ante wëä godönämaï ingacäimpa. Edæ, Cöwë pönö cæcæboimpa, ante doyedë në angaingä inte tömengä ñowo wææ äninque mänine ante dicæ wëä godongantawogaa. ¹⁸ Möitee wodi nänö wææ angainö ëñente cæmö beyænque mönö ænguënencoo do æmö baï Wængongui, Cöwë pönö cæcæboimpa, ante önonque ancægacäimpa. Incæte Wængongui pönö waadete cædinque mæmæ Abadäo wodi ingante apænedinque, Cöwë pönömo æncæminimpa, ante nänö angainö baï cædinque do cægacäimpa.

¹⁹ ïninque, Cöwë pönömo æedäni, ante në angaingä inte Wængongui quïnante ñowo wæætë,

Īīmaī cæedāni, ante wææ angacāi. Īñæmpa tōmengä, Minitō botō änō ante ēñēnāmaī cædinque wēnæ wēnæ mīni cædinō edonque bacæimpa, ante odōmoncæte ante wææ angacāimpa. Mänōmaī cædinque tōmengä, Abadäo wodi Pæingä botō nē angaingä incæ tōmengä nänō ponganca mīnitō ēñente cædinque quēwencæmīnimpa, ante wææ angacāimpa. Mänīne nänō wææ angaine ēñente cæcædānimpa, ante Wængonguī tōmengä anquedoidi inānite da pōnongä pōnīnque tōmēnāni Mōitee wodi ingante māmō odōmōnāni agacāimpa. Tōmengä iñōmō tæcæguedē ongonde bai nē anguingä badīnque Wængonguī nänō angaine ante idægoidi inānite wæætē angä ēñengadānimpa. ²⁰ Ñōwo apænebo ēñēedāni. Adocanque eyepæ cæcä adīnque tōmengä beyæ ancæte ante wacä tæcæguedē ongōnāmaī īmaingampa. Wængonguī iñōmō, Cōwē pōnō cæcæboimpa, nē angaingä inte adocanque incæ eyepæ cædongä ingampa.

Īīmaī cæedāni, ante quīnante angacāi, ante

²¹ Īīnīnque Wængonguī, Cōwē pōnō cæcæboimpa, ante nē angaingä inte wantæpiyæ ate, Īīmaī cæedāni, ante wææ ānīnque tōmengä doyedē nänō angaine dicæ wēä godongantawogaa. Edæ tōmengä mōnō īmonte apænedīnque, Botō wææ angainō beyæ quēwencæmīnimpa, ante mänīne pōnongä ænte quēwēmō bai mänīne beyænque edæ nē nō quēwēmō bacædōmōimpa. Wæætē edæ wīī mänōmaī impa. Wængonguī, Cōwē pōnō cæcæboimpa, angä ēñēnīnque mōnō quēwenguīnque edæ nē nō cæmō bamōmpa. ²² Īīnīnque Wængonguī, Cōwē pōnōmo æncædānimpa, ante nē angaingä

inte iīmaī ante cæcampa. Botō angaincoo ante Itota Codito ingante nē pōnēnāni inānite da pōnōmo ate tōmēnāni wede nāni pōnēnō beyænque ænte ēwocacædānimpa, ante iīmaī cæcampa. Tōmengā mōnō inguipoga tōmāo quēwēmō mōnō wēnæ wēnæ cædimāmo adinque mōnō imonte pōnō tee mōnete bai cæcā ongōmompā. Mānōmaī pōnō cæcā ongongaimō iñōmonte Wængonguī mōnō wede pōnencabo adomonque iñōmonte tōmengā nānō angaincoo ante pōnongā ænte ēwocamompā. Wængonguī, Mānōmaī cæbopa, ante apænecā ēñēninqe yewæmongadānimpa.

²³ Doyedē iñōmō mōnō, Mōitee wodi nānō wææ angainō tōmānō ante mōnō ædō cæte eyepæ cæquiī, ante tee mōnete bai wægāmōimpa. Edæ Itota Codito mōnō nē wede pōnēnongā edonque pōni nānō ponte a ongonganca mōnō tee mōnete bai wægāmōimpa. ²⁴ Iñinque, Mīnitō Codito ingante wede pōnēninqe nē nō cæmīni bacæmīnimpa, ante cædinque Wængonguī Codito gāmænō tōō æmænte bai cædinque wææ angacāimpa. Mānōmaī i iñinque tōmengā nānō wææ angainō beyænque mōnō wapiticæ godāmaī inte Codito gāmænō pongāmōimpa. ²⁵ Ayæ ñōwo iñōmō, Mōnō nē wede pōnēnongā do pongāimpa, ante adinque Wængonguī ñōwo wæætē wææ ānāmaī ingampa.

²⁶ Mīnitō Itota Codito ingante wede pōnēmīni inte tōmāmīni Wængonguī wēñæmīni imīnipa. ²⁷ Edæ tōmāmīni mōnō Codito tōnō godongāmæ guuite bai æpænē guiidinque tōmengā nānō ēwocadō adodō ēwocadinque tōmengā nempo quēwēmīnipa. ²⁸ Tōmengā nempo adocabomō

inömö inte mönō adocanque ingantedō ante apænedinque, Oodeocā ingampa, ante änāmaï ingæimpa. Ayæ wacā ingantedō ante adobaï, Guidiego ingampa, ante änāmaï ingæimpa. Ayæ, Waocā nänō nē ö æningä inte awënë beyænque cæte nē quëwengä ingampa, ante mönō änāmaï ingæimpa. Wacā ingantedō ante, Abæ tawænte gocā ingampa, ante mönō änāmaï ingæimpa. Ayæ adocanque ingantedō ante, Onguïñængä ingampa, ante mönō änāmaï inte wacā ingantedō ante adobaï edæ, Onquiyængä ingampa, ante änāmaï ingæimpa. Ìñæmpa Codito Itota nempo quëwëninque adocabomō imompa. ²⁹ Ayæ mīnitō ìñömō Codito nempo quëwëmīni inte mæmæ Abadäo wodi pæimīni baï imīnīpa. Ìnīnque Wængonguï nänō, Cöwë pönōmo æncæmīnīmpa, ante nänō angaincoo ante mīnitō nē ænguimīni imīnīpa.

4

¹ Mäninō ante yewæmōninque botō, Waodāni æbänō cædānīi, ante odömōninque ìimaï ante apænecæte ante yewæmōmopa. Wæmpocā wængä ate tömengä wengä ìñömō wæmpocā nänō ëadincoo nē ænguingä ingampa. Ìnīnque wæmpocā ayæ mīingä quëwengäñedë mänincoo tömancoo do ænte baï tömengä wengä nē ëacā ingampa. Incæte tömengä wengä tömancoo nē ëacā incæ edæ tömengä wëñængäñedë guiquënë wæmpocā beyænque cæte nē quëwengä baï inongä ingampa. ² Ìnīnque wæmpocā do äninque, Ìionæ iinque bayonte botō wengä do picængä badinque

nämä nē angä bacæcäimpa, ante nänö angaiönæ iinque baganca nē aadäni inänite wæpocä angä eñëninque tömënäni wæætē wēñængä ingante wææ aadänipa. Ayæ, Wēñængä nänö manguincoo ante æbänö cæquii, ante nē aadänique änäni eñente wēñængä incæ cæcampa.

³ Mönö iñömö doyedē mäningä wēñængä bai adobai picæmō inämaï mönō ingaiñedē inguipogaque nāni wææ angaiñonque ante eñente cægamöimpa. Waocä beyænque cæte nē quëwengä bai mönō adobai inguipogaque nāni wææ angaiñonque ante eñencæte ante cædinque mäninö beyænque cæte nē quëwëmö bai inte wægamöimpa.

⁴ Incæte Mæmpo Wængongui iñömö, Iiönæ da pönömo poncæcäimpa, ante doyedē nänö angaiönæ iinque bayonte tömengä Wengä ingante da pönongä pongacäimpa. Iingä Wēñængä ingante onquiyængä mangä eñadinque tömengä Wængongui nänö wææ angainö ante nē eñente cæquënegä nänö baquinque pægacäimpa. ⁵ Iinque mönö Möitee wodi nänö wææ angainö beyæ tee mönete bai wæyömonte adocä Wængongui Wengä incæ, Minitö abæ tawænte bai picæmini badinque näwä wëmini bate quëwencæminimpa, ante mönö imonte ængä beyænque mönö abæ tawænte bai quëwëmompa. ⁶ Mæmpo Wængongui iñömö, Minitö näwä wëmini imini beyæ, ante tömengä Wengä Önöwoca ingante mönonga da pönongantapa. Iinque tömengä Önöwoca iñömö, “Mæmpo, botö Wæmpo,” ante nē apænecä inongä inte mönö mimönë owodinque adodö ante mönö beyæ apænecampa.

7 Īninqe bitō iñōmō bitō ĩmite nē wææ angaingā beyænque idæwaa cæte quēwengāimi inte ñowo abæ tawænte bai æmæwo pæðimi inte nāwā wēmi iñōmi ĩmipa. Ayæ nāwā wēmi iñōmite Wængongui pōnō cæcā ate bitō tōmengā nānō ēagaincoo ante nē ænguimi babipa.

Nē pōnēmīni æbāmē cæte quēwēmīni, ante wæcampa

8 Wængonguīdi iñāmaī iñōnānite wadāni iñōmō, Wængonguīdi iñānīpa, ante babæ apænedānīpa. Mīnitō wēēnēñedē Wængongui ingante mīni adāmaī iñedē, Wængonguīdi, ante tōmēnāni babæ ante nāni nē ānōnāni beyænque cæte nē quēwēmīni inte ñæ cæyænte bai wægāmīnīpa. 9 Ñowo iñōmō mīnitō Wængongui ingante ate bai nē pōnēmīni ĩmīni inte ædō cæte wapiticæ ante ēñēmīni. Æ wadō ante godōmenque āmo. Wængongui incæ mīnitō ĩmīnite do ate pōnengaingā ingā incæte mīnitō ædō cæte inguipogaque quēwēnāni nāni ōnonquedō ante wææ angainō ante ēñente quēwēmīni. Īñæmpa, Mānīne nāni wææ angainō ante wæætē ēñengæīmpa, āninqe mīni ñā cæpote wæquinque āmīni awædō. 10 Edæ Wængongui ānāmaī iñongante mīnitō mā pōnēninqe, Wængongui beyæ, ante mōnō iñōnæ cædāmaī inte ongōninqe ææmæ cæte becæīmpa, ānewēmīnīpa. Ayæ, Ī apāicā iñonte adobaī, iintedæ iñonte adobaī, iñepo iñonte adobaī, Wængongui beyæ, ante mōnō cædāmaī inte ææmæ cæte becæīmpa, ante ōnonque pōni ante cæmīnīpa tōō. 11 Īninqe, Mīnitō ēñēnāmaī inte mīni wæquinque cæmīnīpa, ante adinqe botō mīnitō beyæ ante

guiñente wæbopa. Botö pönö nangui cæbo incæte edæ önonque wabänö cægaboimpa, ante wæbopa.

¹² Botö töninamini eñeedäni. Botö wëenëñedë minitö bai Möitee wodi nänö wææ angainö në cæbo bai inte wæbo aminitawo. Wæætë botö në wææ angaingä ingante idæwaa eñente cædinque abæ tawænte gobo bai minitö adobai cæmini waa tobaimopa. Minitö dicæ botö imote wënæ wënæ cæminitawogaa. ¹³ Wëenëñedë wënæ wënæ mänimo inte botö mänömai beyæ minitö weca pöningue mönö Codito ingantedö ante watapæ apænedinque mä apænebo eñëminitapa. ¹⁴ Ininque mänömai wënæ wënæ bate pömo ate wædimini incæte minitö guiñëñate wædämai inte towæ tänongadämai iminitapa. Wæætë edæ botö imote adinque minitö, Wængongui anquedo ingampa, ante pönente bai cædinque watapæ todinque, Pöe, äminitapa. Ayæ edæ, Itota Codito ingampa, ante pönente bai cædinque, Pöe, äminitapa. ¹⁵ Minitö mäninñedë watapæ mini todinö bai ñöwo guiquënë quimæ todämai iminii. Minitö mäninñedë edæ eyepæ inte bai nämä awinca o togæmöninque botö imo pönö mine timoncædöminimpa, ante pönëninque apænebopa.

¹⁶ Inæmpa minitö iminite näwangä apænebo beyænque minitö ñöwo wæætë botö imote piinte baminitawo. ¹⁷ Wadäni inñömö, Mönitö gämænö ponte eñeedäni, ante nangui cædäni inñömö minitö iminite wënæ wënæ cæcæte ante anewänänpa. Tömänäni inñömö, Pabodoidi inänite eñënëmai inte minitö wæætë mönitö tönö godongämæ cædinque mönitö cæinënonque ante ämöni eñëninque cæcæminimpa, ante babæ cædänipa.

18 Wacä nänö cæinënö ante godongämæ cæmīni cōwē waa īmaimpa. Nāwangä impa. Incæte tōmengä nänö waa cæquēnēnonque ante cæcä adinque mīnitō, Mānīnonque edæ cæcæimpa, ante nanguī cæquēnēmīni īmīnipa. Ayæ edæ botō mīnitō weca quēwēmoyedē cæmīni bai mīnitō botō dæ ämo īñedē cōwē adobai cæmīni waa īmaimpa. 19 Botō wēmīni ēñeedāni. Yædēmadā inte nantate wädä bai botō īñömō wæætē nantate wædinque edæ, Mīnitō mīmōnē Codito ingante ædæmō entawencæmīnimpā, ante nanguī pōnī cædinque wæbopa. 20 Edæ, Mīnitō æbāmē cæmīnī, ante ēñēnāmaī īmo inte botō mīnitō weca pōninque wīi gobæ tedete botō änō bai tededinque wæætē wadō bai tedecæte ante pōinente nanguī wæbopa.

Tada wodi tönö tōmēnä īnante nē cægaingä Agada

21 Mīnitō, Mōitee wodi nänö wææ angainō ante mōnō ēñengæimpa, ante nē ämīni inte apænēmīni ēñēmoedāni. Mīnitō wææ ante tōmengä nänö yewæmongainta incæ adāmaī inte ēñēnāmaī īmīnitawo. 22 Īmaī ante yewæmongatimpā. Abadäo wodi īñömō wēñæna onguīñæna mēnaa īnate tapæigacäimpā. Adocanque guiquēnē nänōogængä beyænque nē cæte quēwengä wēñængä īñongä wacä guiquēnē nāwā nänōogængä wēñængä ingacäimpā. 23 Nē cæte quēwengä wēñængä guiquēnē cōwē mōnō ēñadō bai adobai ōnonque ēñagacäimpā. Nāwā nänōogængä wēñængä guiquēnē Wængonguī, Cōwē pōnōmo æncæbiimpā, ante nänö ānīnō beyænque ēñagacäimpā.

24 Wængonguĩ iñömö, Botö pönö cæbo ate mīnitö Ao ämīni iñinque mōnō godongämæ waa cæcæimpa, ante mempoga apænecäimpa. Iñinque, Wængonguĩ mēnea nänö apænegañö æbänö ineĩ, ante eñencæte ante mōnō mänīna onquiyæna inate adinque pönengæimpa. Wængonguĩ iñömö adopoque apænecæte ante Tīnaiquidi wæænte ongōinque wææ angacäimpa. Mänīneque tōmengä nänö wææ angaīneque ante nē eñente cædāni iñömö Agada wodi wēnāni mänīne beyænque nē cæte quēwēnāni bai nāni baquinque eñadānipa. 25 Mänīngä Agada tōmengä nāni wencabo iñömö wacā ingante nē cædōnāni inte cæningä ñā cæyænte bai inte wægadānipa. Iñinque Adabiabæ ongonquidi Tīnaiquidi ongōinque Wængonguĩ wææ angä ate mōnō iñömö Agada bai wacā ingante nē cæmō bagamōimpa. Edæ Agada wodi nāni wencabo wacā beyænque nē cæte quēwēnāni inte nāni wægainö bai ñōwo Eedotadēē quēwēnāni adobai wacā beyænque nē cæte quēwēnāni bai iñōnāni inte wæwente quēwēnānipa. 26 Eedotadēē inguipoga ongōñömö bai mōnō öönædē æite Eedotadēē bai iñömö ongongæimpa. Mänīñömö Eedotadēē nāni añömö mōnō badä Tada wodi bai impa. Tada iñömö wīi wacā ingante nē cæcā bai iñōnante mōnō tōmēnā wēmō bai imompa. 27 Edæ iīmaĩ ante Wængonguĩ beyæ yewæmongatimpa, “Bitö owæntabi eñēmi. Wēñæ mänāmaĩ iñimi inte bitö, Incayæ ate mancæboimpa, ante wat-apæ tocæbiimpa. Bitö wēñæ nantadāmaĩ iñimi inte, Botö iīncayæ ate toquinque impa, ante yedæ ancæbiimpa.

Edæ nänöogængä ëmö cæte gocä ate adocanque
 inte wëñæ mänämaï iñongante,
 Wængonguï, Botö pönömo æncæbiimpa, angä
 ëñengä inte owæmpocä iñömö godömenque
 nanguï wëñænäni inänite mäñongä
 nänöogængä ëacä guiquënë wëñænäni
 wædænque mancæcäimpa,” ante
 yewæmongatimpa.

²⁸ Botö tönïñamini, ëñëedäni. Wængonguï,
 Bitö wëñængä cöwë pönömo æncæbiimpa, ante
 nänö angainö beyænque Itæca wodi ëñagacäimpa.
 Wængonguï, Cöwë cæcæboimpa, ante mïnitö iminite
 adobaï angä beyænque mïnitö mempoga ëñadinque
 tömengä wëmïni bagamïnimpa. ²⁹ Mänïñedë iñömö
 Wængonguï Önöwoca beyænque ëñacä iñongante
 Itæca ingante önonque në ëñagaingä Itimædo
 guiquënë pïinte cægacäimpa. Mänömaï nänö pïinte
 cægaï baï inguipogaque quëwënäni Wængonguï
 wënäni inänite ñöwo adobaï cædänipa. ³⁰ Ìninqe
 Wængonguï æbänö angä ëñente yewæmongadänii.
 Ìimai impa. “Näwä nänöogængä wëñængä
 mæmpocä ëadincöo æñongä nänöogængä beyænque
 cæte në quëwengä wëñængä wæætë ænämaï
 incæcäimpa. Ìninqe në cæte quëwengä nänä
 wencaya inate mönö wido cæcäimpa.” Ante
 yewæmongatimpa. ³¹ Ìninqe botö tönïñamini
 ëñëedäni. Mönö iñömö näwä nänöogængä wëñæmö
 baï inömö inte mönö nänöogængä beyænque në
 cæte quëwengä wëñæmö baï wïi inömö imompa,
 ante ämo ëñëedäni.

Abæ tawænte bai mönō quēwēnō ante

¹ Mönō iine Möitee wodi nänō wææ angainō ante ēñente nē cæmō inte ñā cæyænte bai wæyōmonte Codito, Abæ tawænte bai inte quēwencæminimpa, ante pönō ö ænte ñimpo cæcā beyænque mönō abæ tawænte gote bai ee quēwēmō imompa. Inique minitō iñömō nē abæ tawænte gogaimini inte tæi ongöningue edæ wæætē mänine beyænque ñā cæyænte bai badāmaï iedāni.

² Iñänāni, botō Pabodobo apænebo ēñenguënë quēwēmīni. Minitō, Mönō eö togæimō inte quēwengæimpa, ante cæmīni inique ædō cæte Codito ængā beyænque quēwenguënēmīni. Iñæmpa mänōmaï cæmīni inique Codito minitō beyæ ædō cæte pönō cæquiringā. ³ Bitō, Botō eö togæimo inte quēwencæboimpa, ante cæbitawo. Edæ botō bitō imite iïmaï ante apænebo ēñēe. Bitō quēwencæte ante cædinque eö togæïmi babi inique Möitee wodi nänō wææ angainō tōmänō ante bitō ēñente cæte quēwenguënēmi babaïmipa tōö. ⁴ Pancamīniya, Nō cæmō mönō baquinque Möitee wodi nänō wææ angainō ante ēñente cæcæimpa, ante ämīnitawo. Iñæmpa mänōmaï ante nē ämīni inte minitō mönō Codito ingante do pango cæte bai cæmīnipa tōö. Edæ pango cæte nänēnē goyōmīnite tōmengā ædō cæte pönō waadete cæquiringā. ⁵ Mönitō guiquënë, Wængonguï ayongā mönō nē nō entawēmō bacæmöimpa, ante nangui pōni æinente wänō cōñömōnite Wængonguï Önöwoca pönō apæneca ēñēningue mönitō, Mönō nē nō entawēmō badinque watapæ bacæimpa, ante wede pönēmōnipa. ⁶ Edæ Codito Itota nempo

quëwëningue ëö togæïmö ïmö incæ bagæmö ïmö incæ tömämö adobaï önömonque ïnömö ïmompä. Wæætë edæ Codito ingante wede pönëningue në waadete pönëmö ïñömö mäninö mönö pönënö beyænque waa pönï entawëmompä.

⁷ Minitö guiquënë wëenëñedë godongämæ pogodo gote bai nanguï cædinqwe waa cæmïnitapa. Edæ ñowo guiquënë mïnitö waa pönï pogodo gote bai cæyömïni æcämë wææ äna ëñënimini inte wæætë Wængonguï nö ante nänö apænegainö ante ëñënamäi cæmïnitawo. ⁸ Wængonguï mïnitö ïmïnite në aa pegaingä inte tömengä ïñömö edæ, Æñënamäi cæedäni, ante dicæ wææ angantawogaa. ⁹ Edæ, “Yedæ æmpocæïmpä, ante cædinqwe guiyä pönï da wente ate päö cæquïmo tömäo guipæñö päö yedæ æmpopa,” ante pönëningue ïïmäi ante ëñengæïmpä. Adocanque wapiticæ wææ angä ëñëningue nanguï ïnäni wæætë oda cæte wæcædänïmpä. ¹⁰ Mönö Awënë nempo mönö quëwencabo ïmompä, ante pönëningue botö, Minitö botö pönënö bai pönëmïni inte wïi wapiticæ ante pönenguïmïni ïmïnipä, ante pönëmopa. Wæætë edæ æcämenque mïnitö ïmïnite wapiticæ ante wææ angää, ante adinqwe Wængonguï në apænte angä ingante cöwë godö pangä wæcæcäïmpä.

¹¹ Botö tönïñamïni ëñëedäni. Botö Itota awäa wængacäïmpä, ante apænebo ëñëningue, Æö togæïmïni baedäni, ante në änäni ïñömö botö ïmote cöwë pïïningue pänäni wæbo aedäni. Incæte botö tömënäni näni änö bai, Æö togæïmïni baedäni, ante ämo bai tömënäni botö ïmote wïi bæi ongöningue pancædönänïmpä. Edæ mänömainö ämo bai

tömēnāni wæætē pīnāmaī īnāni inte, Pabodo Itota nānō wængaiwæ ante apæ necā awædō, ante tee tēwate bai oda cædāmaī incædōnānimpa. ¹² Mīnitō īmīnite nē wapiticæ ante wææ ānāni īñōmō nāmā wido togænte bai cædinque nāmā ta ñænte Codito ingante nē pōnēmīni weca pōnāmaī īnāni inte waa īmāimpa, ante awædō.

¹³ Mīnitō botō tōnīñamīni abæ tawænte gote quēwencæmīnimpa, ante mōnō Awēnē mīnitō īmīnite apænte aa pegacāimpa. Incæte mīnitō, Abæ tawænte godīmōni inte inguipogaque mōni cæinēnō ante godōmenque cæcæmīnimpa, ante cædāmaī iedāni. Wæætē edæ wadāni īnānite godō waadete pōnēninque tōmēnāni beyæ ante cæedāni. ¹⁴ Edæ Itota, “Nāmā bitō waadete pōnēnō bai pōnēninque bitō wacā ingante adobai edæ waadete pōnencæbiimpa,” angacāimpa. Īne adodeque ēñente cæmō īninque Wængonguī nānō wææ angainō incæ tōmānō ante do nē cæmō edæ babāimompa. ¹⁵ Edæ babæidi bai nāēmæ pocænte bai cædinque nāēmæ gāwæī cænte bai cæmīni bai mīnitō nāēmæ wido cædinque wantæ biquēnēmīnidō anguēnē, ante apa quēwēmīni.

*Mōnō Wængonguī Ōnōwoca nempo
quēwengæimpa, ante*

¹⁶ Ñōwo āmo ēñeedāni. Wængonguī Ōnōwoca ēwocadinque quēwēedāni. Mānōmaī quēwēninque mīnitō inguipogaque mīni cæinēwēnō ante wīī ēñēninque nāmā beyænque ante cædāmaī inguimīni īmīnipa. ¹⁷ Edæ inguipogaque mōnō cæinēwēnō ante adinque Wængonguī Ōnōwoca īñōmō edæ Baa angampa. Ayæ wæætē æcānō inguipogaque mōnō

cæinewënö ante cæte quëwëna tömengä Wængonguï Önöwoca ingante näemæ Baa angampa. Ìninqe mönö inguipogaque cæinewënö ante wæyömö Wængonguï Önöwoca guiquënë, Wadö cæedäni, angampa. Mänömaï beyæ mīnitö mīmönë wæætedö wæætë ante bai entawëmīni inte mīnitö nāmā mīni änö ante ædö cæte cæquimīni. ¹⁸ Incæte mīnitö imīnite Wængonguï Önöwoca nöinö töö æmænte mäocä gomīni inte mīnitö Möitee wodi nänö wææ angainö ante do abæ tawænte gomīni imīnipa.

¹⁹ Inguipogaque mönö cæinewënö ante ëñëninque në cædäni iñömö æbänö cædänii, ante edonque abaimpa. Edæ iïmaï impa. Tömënanī nänöogængä ināmaï iñongante dö godö guëa towënānipa. Wentamö pönëwëninque cædānipa. Önonque guïñëñadāmaï inte nāmā baonque pönëwëninque towënānipa. ²⁰ Wængonguïidi inānipa, ante badöninque ædæ wæænte waa adānipa. Idö bai yewæninque önonque tedewënānipa. Piinte quëwënānipa. Tiyænö tiyæ tedewënānipa. Wacä godömenque ængä ate wædinque piinte awënānipa. Ænguï bawënānipa. Nāmā waa tobote, ante anewënānipa. Wæætedö wæætë äninque nāwæ godānipa. Wadö ante nāni cabo wadö ante nāni cabo badinque wæætedö wæætë cædānipa. ²¹ Wacä gomonga ængä ingante godö piinte adānipa. Ti nāmæ nanguï bedinque dowænte badānipa. Ayæ nanguï pönī godömenque bedinque nanguï pönī cæninque guïñëñadāmaï inte towënānipa. Ayæ godömenque quiëmë bai në cæināni inānipa. Mänömaï cæte quëwënāni iñömö

Wængonguī Awēnē Odeye nempo ædō cæte edæ guiquinānii, ante do botō āninō bai ñōwo wæætē āmo ēñēedāni.

²² Wængonguī Ōnōwoca ingante ēñente nē cæmō guiquēnē mōnō waincawæ incate bai iīmaī cæmompā. Waadete pōnēmompā. Watapæ tomompā. Gānē entawente pōnēmompā. Ee cæte pīināmaī imompā. Waadete cæmompā. Wadāni beyæ ante waa pōnī cæmompā. Wæntædāmaī inte cōwē cæmompā. ²³ Gānē pōnēnīnque ædæmō cæmompā. Nāmā wææ ānīnque nō cæmō imompā. Wængonguī Ōnōwoca ingante ēñēnīnque mānōmaī cæmō adīnque Wængonguī mōnō cædōnō ante wææ ānāmaī ingampā. ²⁴ Mōnō Codito quīmō inōmō inte mōnō baō tōmengā tōnō awænēmæ timpote bai wængaīmō īnīnque īnguipogaque mōnō cæinēwengainō adobaī awæ timpote bai iñonte mōnō abæ tawænte bai godīmo inte baonque ante mōnō cæinēwēnō ante ēñēnāmaī inte cæmompā. ²⁵ Edæ Wængonguī Ōnōwoca ængā beyænque quēwēmō inte mōnō tōmengā Ōnōwoca tōnō guēa godongāmæ cægonte bai quēwengæimpā. ²⁶ Mānōmaī quēwēnīnque mōnō nāmā waa adāmaī ingæimpā. Edæ wacā tōnō guēa wæætēdō wæætē ānāmaī ingæimpā. Wacā gomonga ængā ingante mōnō godō pīinte adāmaī ingæimpā.

6

Mōnō wacā ingā wacā ingā iñacabo cæcæimpā, ante

¹ Botō tōniñamīni ēñēedāni. Wacā ēñēnāmaī cædinque oda cæte wæcantawo. Īnīnque mīnitō

Wængonguī Ōnōwoca ingante mīni ēwocacabo iñōmō, Māningā nē oda cædingā inte Wængonguī taadonque adodō pō gocæcāimpa, ante cædinque tōmengā ingante ædæmō cæedāni. Mānōmaī cædinque nē apæ necā guiquēnē, Botō adobaī ēñēnāmaī cæinente wīi bacæboimpa, ante pōnente wædinque nāmā wææ cæedāni. ² Wacā teēmente mongænte baī entawengā ate wædinque mīnitō mōnō Codito nānō, Īmaī cæedāni, angainō ēñente cædinque tōmengā nānō mongæncōo iñacabo mongænte baī cædinque waa cæedāni.

³ Æcānō ōnonganque ĩna inte, Botō ñænæmo ĩnōmo ĩmopa, ante pōnēna, tōmengā iñōmō nāmā babæ apænete baī oda cæte pōnengampa. ⁴ Īnīnque adocanque nāmā nānō cæinō cōwā adinque adocanque nāmā nānō cæinō cōwā adinque tōmāmīni, Tōmēmō æbānō cæboo, ante nāmā apænte anguēnēmīni ĩmīnīpa. Mānōmaī cædinque wacā nānō cæinō adāmaī inte waocā nāmā nānō cæinonque cōwā adinque apænte ānīnque, Tōmēmō nō cæbo ĩmopa, ante adinque tobaingampa. ⁵ Edæ adocanque nāmā nānō cæquēnēnō ante teēmente mongænte baī cædinque adocanque nāmā nānō cæquēnēnō ante teēmente mongænte baī cædinque tōmāmīni eyepæ cæbaīmīnīpa.

⁶ Ayæ Wængonguī nānō apænedō ante wacā apæ necā ēñēnīnque nē ēñengā iñōmō tōmengā māincoo pancacooga waincooga ænīnque nē apæ necā ingante eyepæ pædæ godongā æncæcāimpa.

⁷ Tōmēmō tā bocate pæte incayō waocā wāānā adomō baī tā pete ængampa. Mānōmaī ingæīmpa, ante nē angaingā inte Wængonguī iñæmpa oda

cæcampa diyæ waocä wamö ænguingää. Ìninqe, Waocä æbänö cæcää, ante adinque Wængongui pönö cæcä ate waocä nänö cægai bai adobai ænte wæcæcäimpa. Ämo ëñëninque mïnitö wïi wacä wapiticæ nänö apænedö beyæ oda cæquënëmïnidö anguënë. ⁸ Edæ minte pædïmö bai tä pete ængä bai cædinque ïmæcaque ante nämä pönente në cæcä guiquënë adobai ïmæcaque nänö ñömænguinque æncæcäimpa. Wæætë Wængongui Önöwocaque ante pönëninque në cæcä guiquënë Wængongui Önöwoca pönö cæcä beyænque tömengä nänö cöwë wænämaï quëwenguinque æncæcäimpa. ⁹ Ìninqe mönö wæntæye badämaï inte wadäni beyæ godömenque waa cæcæimpa. Ñïmpo cædämaï ïmö ïninqe edæ Wængongui, Ìñedë æncæmïnïmpa, ante nänö angaiñedë ïnque bayonte mäniñedë mönö edæ tä pete bai eyepæ pönï æmaïmompä. ¹⁰ Mänömaï beyæ mönö eyepæ ïmö ïñedë tömänäni ïnänite mönö waa cæcæimpa. Ayæ wadäni në wede pönënanï ïñönänite mönö, Adomö ïmompä, ante pönëninque tömënäni ïnänite godömenque nanguï cædinque waa cæcæimpa.

Waa quëwencæmïnïmpa, ante

¹¹ Botö önompoca yewæmöninque tömëmo ñænæmömo yewæmömöi aedäni. ¹² Codito mönö beyæ awäa wængacäimpa, ante në pönënanï incæ pancadäniya, Mänïne ante ëñëninque oodeoidi piinäni wæcæ wæ, ante nämä wææ cæcæte ante cædänipa. Ìninqe tömënäni, Eö togænte cæmöni ïninqe oodeoidi wæætë mönitö ïmönite waa acædänïmpa, ante cædinque mïnitö

iminite, Eö togæimini bacæminimpa, änänipa. ¹³ Nē eö togæināni incæ edæ Wængongui nānō wææ angainō ante dicæ eñente cædāniyaa. Incæte tōmēnāni, Mōnitō änō bai mīnitō do eö togæimini bamini ate wadāni mōnitō imōnite waa acædānimpa, ante cædinque mīnitō iminite, Eö togæimini baedāni, ante cædānipa.

¹⁴ Botō guiquēnē quiēmenque ante, Waa aedāni, ante dicæ āmogaa. Iñæmpa imæcaque ante botō cæinēmāmo ante botō, Codito nānō wængaiwāa tente bai wæinēmāmo impa, ante bai cædinque edæ mānimāmo ante æmæwo wido cætabopa. Ayæ tōmēmo adobai Codito tōnō āanque bai awāa wænte bai ingaimo inte edæ imæcaque botō cæinēnō ante cædāmai inōmo imopa. Inique, Mōnō Awēnē Itota Codito awāa wæninque mōnō beyæ waa pōni pōnō cægacāimpa, ante pōnente wædinque botō māniwænque tōmengā nānō wængaiwænque ante waa ate apænedinque edæ wade ante cōwē waa ate tededāmai incæboimpa, āmopa. ¹⁵ Inique eö togæimō incæ bagāamō incæ ōnonque pōni edæ impa. Edæ Itota Codito badongā beyænque mōnō miimō quēwēmompā. ¹⁶ Mānōmainō ante pōnente cæmīni iñōminite Wængongui pōnō waadete piyænē cæcā adinque mīnitō gānē pōnente waa cæcæminimpa. Idægoidi iminipa, ante Wængongui nē nānō angaimini incæ mīnitō mānōmai cæte quēwencæminimpa.

¹⁷ Botō Itota beyæ ante cæyōmō wadāni pānāni wædimo inte botō do baonga āmogate ee eñabo iñōmote ñōwo iincayæ ate mīnitō tōmāmīni edæ ee amīni quēwēmoedāni. ¹⁸ Botō tōniñamini waa

quëwencæminimpa, ämopa. Mönö Awënë Itota
Codito pönö waadete apæncä ëñëninque mīnitō
mimōnē adobai waadete entawencæminimpa.
Māninque ante yewæmōmopa, ante Amëë ämopa.

Wængonguī nānō Apænegainō
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbb8690